

La nova planisaziun dals ospitals grischuns

■ (cc) La planisaziun grischuna dals ospitals vegn fixada da nov sin il stglim da la lescha, e quai tenor las prescripziuns federalas che s'orienteschan a la prestaziun: La regenza grischuna suttametta al cussegl grond ina legislaziun executiva correspudenta. Per il 1. da schaner 2013 duai il chantun Grischun pudair ademplir las novas disposiziuns federalas concernent ina planisaziun dals ospitals che s'orientescha a la prestaziun e concernent in provediment medical da la populaziun che correspunda als basegns. Sunter che la consultaziun è terminada suttametta la regenza grischuna al cussegl grond ina revisiun parziala da la lescha per promover la tgira da personas malsaunas e l'assistenza da personas attempadas e da personas che basegnan tgira (lescha per promover la tgira da personas malsaunas). Il cussegl grond vegn a tractar la fatschenta en la sessiun d'avust 2012.

Rentabilitad e qualidad sco criteris centrals

Il project prevesa in nov chapitel davart la planisaziun dals ospitals e davart la glista

dals ospitals en la lescha per promover la tgira da personas malsaunas. La planisaziun dals ospitals è l'instrument strategic da la regenza, cun il qual ella eruescha e determinescha periodicamain tant il basegn da prestaziuns sco er la purschida necessaria per il provediment medical da la populaziun. Sin basa da la planisaziun dals ospitals relascha la regenza ina glista dals ospitals che cuntegna ils furniturs da prestaziuns, pia ils ospitals e las clinics, sco er lur incarica da prestaziun.

Tenor il dretg federal ston vegnir resguardadas en spezial la rentabilitad e la qualidad da las prestaziuns furnidas per giuditgar e per tschernir la purschida che duai vegnir garantida sin la glista dals ospitals. La planisaziun e la glista dals ospitals dal chantun – che sa referivan fin uss al dumber da letgs – vegnan remplazzadas per quest intent tras ina planisaziun e tras ina glista che s'orienteschan a la prestaziun. Per promover lur cumpetitivitad pon – tenor la nova lescha per promover la tgira da personas malsaunas – dentant er vegnir surdadas als ospitals grischuns incaricas da prestaziun che surpassan il basegn. Plina-



Sin basa da la planisaziun dals ospitals relascha la regenza ina glista dals ospitals che cuntegna ils furniturs da prestaziuns.

FOTO P. DE JONG

vant pon ils ospitals en il chantun vegnir obligads da furnir tschertas prestaziuns sche quai è necessari per il provediment da la sanadad. La lescha prevesa sancziuns en

cas che las disposiziuns na vegnan betg observadas.

Sper ils criteris da la rentabilitad e da la qualidad fa la lescha ulteriuras preten-

siuns envers ils ospitals. Quellas èn la cundiziun per survegnir ina incarica da prestaziun. Uschia po la surdada d'incaricas da prestaziun per exempel vegnir fatga dependenta da dumbers minimals da cas sche lur influenzas sin la qualidad dals resultats èn vegnidas renconuschidas scientificamain.

Il provediment da basa decentral resta mantegni

Las purschidas decentralas existentas dal provediment medical da basa en il chantun vegnan ad esser necessarias er en l'avegnir. Quai mo gia per ch'il provediment en cas d'urgenza possia vegnir garantì a temp. Prestaziuns raras u complexas, che pretendan ina infrastruttura fitg chara ubain enconuschientschas ed abilitads spezializadas, vegnan dentant concentradas tras la nova legislaziun. Il resultat duai la finala esser ina planisaziun ed ina glista dals ospitals che tegnan quint da las pazientas e dals pazients, che mettan a disposiziun a la populaziun dal chantun ina purschida adequata e che pussibileschan ina concorrenza reglada tranter ils purschiders.